

東川劉文簡公集

東川劉文簡公集卷之十六

誌銘

刑部主事呂君搏萬墓誌銘

成化丁未春禮部舉進士三百五十人而在吾蜀者三十人故事取士以南北中爲數中士居南北十之一廷議䟽時論有遺賢

詔南北各退二益之故是歲所舉視舊有加余嘗念吾蜀遭際之盛自愧謏乏與彼二十九人者皆英偉負竒當必大有所樹立未幾李茂林以博野令卒萬廷瑞以庶吉士卒李鳴鳳以南京工部主事卒鄧行

正以未授官卒鄒汝愚以薦吉士謫石城吏目卒方
悼惜不已而搏萬又卒矣於乎惜哉搏萬卒逾月其
父謁選銓曹判荆門州遂歸柩葬於鄉來請銘搏萬
姓呂氏諱鵬搏萬其字其先楚人祖日均秀者避兵
之蜀遂世家於達縣曾祖諱亨中爲陰陽訓術祖諱
伯威隱德不仕荆門君諱塘母高氏搏萬少穎敏器
宇凝重稍長學務精博不徒掇拾古人糟粕逾弱冠
舉於鄉入成均日與名士究義理之精深及古今人
物之理亂賢否不妄與人交交必士之有賢行者凡
心所至皆得其肯綮故如作詩寫字亦有家法曰即

此是學也丁未舉進士主事刑部以清謹重於時而
訊鞠參錯得古人敬獄之意然執法不阿嘗有訟謀
逮貴幸竟申其法幾爲所中傷君亦不變曰我道如
是賣法取容非我志也與同邑給事中表德孚負外
郎唐文載爲碧雲會倡和必求古詩人用意處非但
朝風弄月以是隱然名震京師於乎以搏萬之操心
飭行歷是以徃雖都位卿相亦宜而居刑部乃僅一
年謂之何哉豈窮達壽夭固有命耶抑如搏萬者寔
造物所忌也搏萬卒於弘治壬子四月 日享年
四十有五配杜氏女一聘李璽即前所稱博野令之

子也銘曰

鴻漸之翼橫絕四極騏驥之駛一日千里其逢孔時
遽闕其施於乎是非命耶

義安處士湯翁墓誌銘

翁諱瑀字子佩姓湯氏別號義安其先孝感人元季
有諱伯堅者徙蜀之資州又徙普州遂家焉普州今
安岳也世有隱德父諱希詔工楷篆書邑大夫辟從
事以不能與時俯仰未仕義安生而丰神不類群兒
母吳氏性嚴尤治家有法義安善事之侍左右雖一
言不敢肆及卒喪葬一以禮事繼母張如所生居父

喪雖老守禮尤篤或勸之曰居喪之禮六十不毀七十惟衰麻在身先生得無過乎則曰吾心必如是而後安也居嘗好讀書凡陰陽醫卜星命類皆涉獵在鄉黨於子姓恒語以古今人物賢否致教戒焉其士之至自遠方者極意延納陝西終南山有僧以禪行聞至邑即杖屨訪之曰終南有旱藕啖之能起沉疴信乎僧心異焉曰君殆博物者矣所居負山繞溪暇則借田父野老高人逸士登臨瞻眺或命酒縱奕於山巔水涯之間蓋不知世有所謂名與利者邑大夫賢之每敦請克鄉飲賓不屑就弘治壬子八十有九

有例給章服我冠博帶鶴髮童顏里人榮之丙辰春
正月初六日無恙而卒距其生享年九十有三娶梁
氏有賢德先義安沒三十年義安不再娶男四孟東
煥新孟時孟新女二婿張志祿李高高孫十有四曾
孫三十有一有曰輅者補邑庠弟子負積學有待曰
佐者舉癸丑進士敦朴謹厚能大受者蓋其先世厚
積而益培植於義安進士其發之始也爲善無不報
於義安乎見之而亦不必其身享之矣義安卒之歲
其子將卜葬於龍窩山北之原先期進士奉行人李
君舜在之狀請銘銘曰 惟木之華其本則固惟流

之長其源則汴竭竭義安洵美厥持乃嗇其施弗顯
於時弗顯於時昌厥孫子莫爲之先孰爲之啓有命
自天象服在躬積善之慶聿其日崇不於其身而於
其後龍山之陽其永無疚

廣西布政使司左叅政金公墓誌銘

公姓金氏諱爵字良貴號蓼猗翁其先松江上海人
自其祖諱亨者占戎籍於利州衛家成都之綿州今
遂爲綿州人亨生天澤天澤生祐祐公父也以公貴
贈太僕寺丞至中憲大夫思南知府母林恭人公生
而博朴穎異甫十歲補郡博士弟子負在醜夷雖甚

少而言動不妄進止有常處屹如老成人識者器之
旣弱冠領天順己卯鄉薦又十年而舉進士爲山陰
令山陰隸浙紹興訟牒蝟集環左右吏人無弗欲售
其奸者公治之一以仁恕爲主而律之以廉御之以
靜民翕然愛戴之如父母當道者數旌異爲有司勸
居四歲被召擢太僕寺丞太僕職馬政任之者多
闕於自視而政亦多隳廢公曰世豈有官負人者乎
乃廣詢博議得其弊之源委悉力剗削不少假借民
特稱便一時論太僕之最者公爲首秩滿陟守思南
思南民夷雜擾寬嚴未易得其心公以山陰治之而

加恩信焉民夷頌德至相謂自吾郡有守未見有如
公之惇恪廉平者也撫按諸公文䟽論薦歲不虛及
瓜期去任老稚扳轅卧道誼填軼至不能發故事凡
守令秩滿詣銓曹課功叙遷公自思南抵家浹歲無
復出意銓曹廉其賢䟽於上陟廣西布政司左叅政
未受命而公不起矣時弘治壬戌正月十日也享
年六十有五惜哉公純誠出於天性無所矯飾其事
上使下應接踈戚雖等級紛然而其心不異人亦莫
之敢欺故其歷官之績雖卓偉烜赫而亦不能以超
進顯拔越常格然人固以是益信其操也平居耻言

人過在太僕讀禮家居母恭人喪尚未殯偶隣家災
公率子姓奔採見偷兒竊入室內急走避推其心蓋
不知人有惡者矣子男二長獻民舉進士爲御史山
東按察司副使兵備天津聲望方隆次俊民育德郡
膠女三長溫玉次粹玉次璞玉皆適宦族孫男四長
白次臯弘治辛酉舉人次皞次臬孫女二曾孫女一
公卒未三月其子副使解職守制乃述其履歷之槩
問銘於余切念公偕家君同舉進士同仕於浙有通
家之誼知公爲詳不可以不文辭遂叙而銘之銘曰
自古先民心一於誠業隨位建名以行成降及中世

澆淳散樸巧宦接跡民喁怨讟乃有如公確於自信
諧世徼寵吾曷弗慎煌煌厥命不自我違不自我違
奕世其輝相古先民豈蹟於今行之在我孰汨其心
我爲之銘撮其大者以固其藏萬世之下

太孺人梁母張氏墓誌銘


太孺人姓張氏爲 贈大理評事梁公諱 之配大
理評事珠之母也珠字時重其母卒於弘治乙丑仲
冬十有八日距其生在永樂丁丑享年八十有九先
是時重以太孺人今年七月之季七日壽躋九十將
具疏謁告歸省不郵索予言以爲稱觴之賀予旣唯

矣不泐月計至時重哭踊踰禮將歸乃復詣予曰珠宿積險彘既延吾母以至殞絕俾不獲遂其圖惟是誌石昭不朽於窀穸者尚有賴焉幸哀而許之按狀太孺人銅梁名族父處士諱志海母 氏太孺人生而端莊沉靜爲處士所鍾愛甫及笄評事公方擇聘乃求委禽焉而處士遂許之比歸事舅姑克脩婦道自女紅以及中饋無弗精善舅姑獨喜之其事公未嘗或違其意而治家之勤儉以助於內者里中傳以爲式性好施予人有假貸不少靳或負之則曰彼不我償我應償之我無負人人孰我負競誦以爲德言

公篤意教子而太孺人相之尤不以愛廢嚴時重遊
邑庠太孺人躬紡績資給既領薦於鄉舉弘治己未
進士公已捐館太孺人且喜且悲曰兒果獲遂其志
恨其父不逮也尋時重請於

朝得歸省太孺人年已八十有四賀客填門猶親延
納禮意勤渠如壯婦然踰年即責以大義遣之京曰
人之敬我者以汝有今日耳可速往圖報稱不宜効
尋常兒女子戚戚弗離側也時重不得已辭至京拜
大理評事初考績最她封如例即遣人奉冠帔詣
家太孺人服之復喜曰朝廷恩及所生我幸得於

未沒也好語吾兒益求盡所職毋徒念我其識悟如此於乎是可謂賢母矣有男三長瓊次琬次即時重女三皆遣適士族孫男五宗佐仁似伍孫女六曾孫男二壽階王階曾孫女二其葬在卒之明年 月

日其地爲  之原與公合葬禮也銘曰

古昔有言是母是子彼太孺人孰曰非是翟冠象服寵命自天亦靡靳之曷永其年於乎是維太孺人之賢

彰德府知府馮公墓誌銘

弘治十有五年七月十日  彰德府馮公卒於家初

公在郡既考績獲進職給驛誥命乃累以年至懇求
退撫巡諸公廉其賢固留之彰之父老數千人又詣
汴泣訴請留遂不果繼而述職京師得致其事去既
抵家踰三月而屬績豈賢人君子之獲考終命者固
亦不偶耶公諱忠字原孝世家浙之慈谿曾祖諱勝
祖諱子強父諱順以公貴贈刑部主事至中憲大夫
彰德府知府母余氏贈安人至恭人公生有異相性
復穎敏絕群識者知其不凡既長工科舉文詞所占
詩經及四書義率自撰錄學者競轉抄以爲式經指
授者皆有聞於時成化戊戌舉進士拜刑部主事守

官守身懲懲無罣違而議法處辟則務歸平恕陝西
有疑獄久不決屬公體量時三原王公居林下見其
精敏明決大加賞識既竣事遷擢負外郎尋三原公
膺 召爲冢宰會揚州守缺乃曰是非馮員外莫宜
揚州吾舊治而馮吾舊所知也既至郡益惕厲惓惓
興學愛民剗削姦蠹其於視時緩急爲逢迎以邀聲
譽不恤也故民甚德之而亦有不悅者適同寮楊通
判張燕設烟火戲致人輻輳浮橋競觀被溺爲按治
者所劾公坐累左遷長蘆蓋邇同知久之復擢守彰
德其治行一如揚州不變旱則徒跣走山谷祈禱必

得雨而後止。趙靖王欲易世子以公苦諫卒不易。其馭吏與民絕不存形跡藹如家人父子而人亦愛之不忍欺云。配應氏累封恭人生男俱歿沒立兄原誠次子庶爲後有孫二曰：庶先公卒女五長。

適桂明次聘鄭郎中子來醮卒皆應氏出次聘秦教諭子次聘陳氏子。次聘楊考功子皆出側室距其生正統戊午八月二十五日享年六十有五公爲人慷慨疏達其臨事勇於爲義其周人之急則尤誠意。艱惻有不暇內顧者在彰總俸祿所入悉置公帑。一日驛傳乏資用卽爇數百兩給之值歲災不忍責償。

比歸林下代守者稽覈庫籍詰逋負者始得如數送
至家其事兄如事父其檢身自以爲無愧於心嘗曰
吾他日築精舍當榜曰吾寧處其用意可知也好古
詩文所著亦有體格號松崖集於乎是豈非篤行而
能于官者耶公沒之明年其姻友吾同年考功楊名
父狀其履歷諉銘墓石余入仕即知有公名而又知
考功之直諒慎許可乃爲之銘曰

古之仕者貴行其志如彼三黜心固無愧允義馮公
小心謹畏在職能守人德其施弗顯於時厥聲弗墜
退而令終豈獨其智後欲知公視此勿棄

謝母孺人林氏墓誌銘

孺人林氏諱實鄉江西新建人爲太僕寺丞諱惟盛之女贈 太子少保工部尚書謝公之婦處士諱經之妻工部主事麒之母孺人聰明貞靜方幼即閑禮訓爲父母所偏愛旣長擇配歸處士尚書公自天順庚辰舉進士第一入翰林爲學士以至晉位司空望烜赫而祿亦豐矣孺人隨其夫侍養京邸執性儉約畧無富貴驕侈之態外聞其代姑鄧夫人親中饋之事以供賓祭無弗順適夫人之心安焉而於補紉澣濯之勞苦則恒躬率其下爲之惟恐弗愜夫人之意

以爲憂夫人遊疾孺人旦夕侍湯藥衣不解帶者五月及卒凡殮於身者必手自製成化丁未尚書公薨於位處士君扶柩歸旣襄事以久於外家計索然孺人所以弼君築第室置田宅以爲生業者咸有條理而於交際宗戚調恤鄰里尤曲有恩意故內諧外附上下裕如生子一即麒日課之讀書不以愛少縱麒遂舉弘治丙辰進士爲今官女子二皆訓以工女事適士族初尚書公貳卿秩滿例獲蔭其後謂當屬於長孫麒孺人語處士君曰先姑屬續惟念兄洎諸孫不及見泣語吃吃不置盍推讓之安知先姑不遲此

瞑目於地下乎尚書公義而聽之人以爲難而麒竟以科甲顯比麒登第歸固欲終養孺人責以大義遣之則孺人之懿行不獨著於壺內可稱道也孺人以弘治十六年七月十七日卒享年五十有六麒得訃哭踊幾絕圖所以貽後世者爰屬其友刑部員外郎沈君崇實叙其內行之槩問銘於余將卜葬原銘之曰 林氏之先昌於德門延及僕正克紹前聞淑哉孺人婉婉維則來嬪大家壺儀不忒壺儀不忒爲婦之恒蔭叙有典讓而弗承有嗣之賢竟成其志天豈無知用昭厥義我爲之銘以示將來彼閭墻者

亦何心哉

西溪居士墓誌銘

於乎古道陵夷世教衰薄故自常棣之音息而角弓之刺興雖學士大夫家鮮有敦友于睦愛之行者而况於其他乎而余所耳聞嘆賞則如富順之西溪居士者其昆弟之友愛世亦鮮其儷矣居士姓周氏其父諱復先號竹坡生二子長諱安字正義即居士次諱寧字一之號靜菴其居距富順僅一舍許爲鐵錢溪有屋數椽田百畝而居士偕靜菴居其中事無鉅細咸統於一故自少壯至皓首怡怡無間言家衆雖

踰千指恩愛不見有踈戚薄厚故其和氣薰蒸於家
而鍾於物乃產並頭蓮五六莖兩岐麥六七本及交
柯竹連理枝間見數出非適然也靜菴之子載舉弘
治庚戌進士爲兵部武選主事三載秩滿例應晉
封其父而載承靜菴意欲請移於西溪士論沮以例
則割俸金若干入民部獲授七品散官故二老一時
同被 恩典縉紳義而榮之於乎若居士者其視古
人之友愛亦豈有異乎居士之先爲楚之興國人自
其曾祖諱志珉者以兵燹徙蜀之富順今遂家焉祖
諱舍琦號山翁山翁生竹坡爲居士之父居士讀書

博古通史學善吟咏構書舍於所居山之麓歲延師
儒課子弟誦習舉子業而以時考校之若載者皆教
育所致鄉鄰子弟有可教者亦納之而調其衣食之
不給故一時間里咸稱長者鄉族有爭訟得居士化
誨多不求直於官亦有欲求直於其家而望廬輒自
息成化甲辰歲饑入粟於官賑濟叙州守上虞陸公
欲請勅旌異以激勵尚義者居士力辭而止乃語
之曰賢積善脩德不事表襮如此子孫其昌大乎春
秋八十有五卒於正寢爲弘治壬戌七月 日配
氏與居士合德生子男三長健次儼次价女三皆

適士族孫男四孜孜牧豎初居士將屬纊治命以家政委載且懇懇訓以治家居官讀書之要特載以靜菴沒讀禮家居比服闋詣銓曹則委於堂第某逮今守其家法亦可以知居士之篤恩敦禮有素矣居士卒之明年其子卜葬於 之原載來問銘銘曰

孔子有言孝弟之至通於神明彼西溪者其和氣所鍾而召祥產異亦何異哉乃柩其施晦而在下化行於家斯世則寡顯顯有位鮮不愧之刻詩紀德永藏於斯

國子生祝君彥華墓誌銘

國子生祝彥華諱芳其先出唐山祖諱成用薦爲南
城縣典史坐累謫滄州遂家焉今爲滄州人父諱文
秉母 氏彥華生而秀爽恂恂異流輩初受學於從
兄茂借從子今符臺卿廷瑞淬礪舉子業旦夕勤苦
不少懈從兄喜語之曰吾門代不乏人矣會秦隴歲
大侵有 詔得輸粟入大學君因卒業焉父之需次
銓曹方嚮用有期而忽捐館舍矣於乎惜哉彥華爲
人溫和縝密孝友出於天性父卧病湯藥必親嘗其
憂形於色至不覺鬚髮星星出時年纔二十八也及
卒哀毀踰禮殮殯咸竭其誠母喪讀禮每春秋塚祭

則攀木悲號涕淚著處宛有血痕撫愛少弟春尤極
周至恒督誨其經理家業亦令以義受散官在族黨
里隣刻意周貧賑乏或不克葬者助以棺姻親馮氏
孀居孑立處以室凡服用飲食悉資給焉每冬月固
畜西瓜以濟人之需適田間家僮禽竊禾者至詰之
曰吾非不知獲罪柰母老無以爲養故忍就此耳言
未已泣下君憫而釋之游大學符臺公特爲大理司
正有獲罪者密持白金三錠託求庇君片曰寒門世
以清白相傳安得用是汙我乎其友聞而義之贈以
詩有古羨却金楊公今踵後跡之句其檢身之嚴類

如此有術士感君禮遇曰吾無以報公願授以燒煉
之方君謝曰富貴非可倖致以是欺人何異於盜吾
心固不欲聞願汝亦勿復爲此也其宅心視義所當
爲不以出位爲嫌居家目擊漕河岸幾決乃抗言利
害於有司爲之脩築至今利之與人交和而不流處
家同爨百口小大怡怡然咸相宜娶馮氏與君合德
子男三長世隆補郡博士弟子負次世恭世皞女一
適強克恭亦業儒孫男三生正統丁卯閏四月初一
日以弘治壬戌七月初四日卒世隆輩將卜年
月 日葬於城東祖塋鄉進士張君鏗具狀介符

臺公屬余銘墓石乃銘之曰 其性淳而和其行嚴
而正固爲利器而未一施於政儕諸古人則在所敬

韓天子墓誌銘

鎮守松潘總戎韓公廷傑之子曰魚者吾友錦衣指
揮余公世臣婿也魚字天子生而器度不羣識者稱
爲韓家千里駒旣長雖處紈綺中能脫畧驕貴氣習
以務淬礪於舉子業若與寒士競後先者廷傑官瀘
州衛指揮使握衛章者凡幾年才畧宏遠受知大司
馬青神余肅敏公已而荐陟華要世臣因定交焉而
見其子之異也遂以女妻之弘治辛酉生親迎京師

諸縉紳爲世臣友者咸往賀退而未嘗不厯冰清玉
潤之歎未幾獲試補武學生洎昏禮成未浹兩月忽
以蓋棺往吊嗚呼是凡相識者莫不哀之慟而况於
世臣而况於鍾情者耶生歿又二年世臣遣使歸柩
瀘陽將卜葬方山之原以生之秀異墓當有志乃屬
其弟邦臣具狀諉余生天性孝友弘治戊午應試鄉
闈薄終場母王夫人宿疾作得父自小河叅將致書
即棄歸未至已屬纊號痛幾絕旣扶柩還瀘襄事從
伯兄天錫廬墓側三年據經守禮者所難也距其生
在成化壬寅享年僅二十配即世臣女自誓守志云

韓氏系出淮陰侯傳至宋忠獻公又歷幾世析而三族家山東魚臺入國初爲錦衣千戶者其伯高祖有爲瀘州衛指揮使者其高祖總戎公蓋以世蔭今職今遂爲瀘州人銘曰孰昇其生孰厲其成有燁其宗而卒不聞亢其聲噫

處士趙君墓誌銘

處士姓趙諱啓字良迪重慶巴縣人父諱守誠母李氏君生而聰悟旣長篤志於學視世之進取光顯於時若不難也已而失怙恃孑立弗克遂則以其治生餘力爲里塾師輒者休聞父之會提學憲臣莆中吳

公以嚴明得士心方銳意興社學擇民間俊秀於中命邑大夫舉行誼端恪可爲師範者授之業給復其家君被薦一時子弟多賴造就君坦夷謙厚語言力痛斥浮僞動止有則故人無貴賤賢愚樂親之不敢慢咸稱曰先生善書法得古人用筆意其大者益竒凡名扁顯額必屬於君而君亦樂應人之求不厭居閒手不釋卷雖釋老之教亦每游心焉而溺其中故常不茹葷不喜殺牲僮僕行貨則諄諄以天理戒諭之推其心蓋思無適而不可爲不善也配廉氏與君心合男三編陽補郡博士弟子貞次春舉弘治戊午

鄉進士行不愧士駸駸嚮用次元亦習舉子業蓋皆
得於庭訓者女三俱適士族孫男二民賴民敬處士
卒於弘治癸亥十月二十八日距其生享年七十有
五當屬續時春適卒業太學深居簡出究心所業將
求馳榮其親而訃儵至悲號不自勝乃奉狀詣余請
曰春將戴星歸從兄陽輦卜葬於 之原惟吾親
之德善稱於人而不可沒者覲執事爲之辭鐫墓石
雖晦固顯也乃銘之曰 善之能積兮匪獨於身不
顯者外兮內固可親孰積而不發兮尚昌其後人

封孺人吳氏墓誌銘

正德辛未 月 日

封郟城縣知縣龍潭席公卒殯於邑玉堂山之原其子今山東布政司右布政使書以貴州按察司副使擢河南布政司右叅政家居屬南京禮部侍郎西充馬公誌於墓又踰三年其配

封孺人吳氏卒時甲戌五月二日也其季彖者適舉進士試政工部歸將從諸兄卜日合葬公墓乃具狀問銘於余按狀孺人處士諱顯忠之女其先系出江西之新淦宋季有諱法虎者以荆南太守率兵取蜀之釣魚城有功子孫因家遂寧世爲陰陽訓術故今

爲遂寧著姓至處士尤以隱德稱孺人幼聰慧不羣
稍長習女工暇即讀烈女傳亦能默誦孝經諸書曉
大義故事父母得其懽心里人多稱之而龍潭公鍾
愛於父方擇配遂委禽焉旣歸克執婦道梱以內無
尊卑長幼上承下接人咸愛而敬之雖婢僕亦各以
爲於我有殊恩也居常鷄鳴即起事紡織無寒暑間
龍潭公初銳志求仕進而沮於家政莫紀綱之者孺
人相之率僮豎以力田及內外事無弗整飭舅姑恒
嘉之語曰吾兒有此佳婦世業可弗隕矣性慈恕公
常爲人所侮僮僕賈勇將甘心焉孺人勸公以含忍

容之而叱禦諸僮僕毋敢出人竟愧懼詣門謝見里
隣之貧窶者不自恤其乏分粟濟之有疾苦者令求
藥與療里人無大小咸稱曰此吾鄉之慈母也事舅
姑尤孝養舅姑既老且病日侍湯藥衣不解帶者月
餘既終罄家貲相公襄事子男五長即書舉進士令
郟城以循吏著稱歷遷今秩方嚮用次詩以義給散
官章服次記蚤世次春辛酉舉於鄉次即彖孺人之
有諸子也雖甚愛而教不廢在孩提恒口授幼學之
事欲浸漬以成其性或娛以戲玩無益之物則深斥
之比長延師以教其資給不靳脫簪珥少有過懲戒

踰嚴父其不溺愛如此孫男十一忠恕志懋懋愈愍
愿悠忍孫女七歸士族孺人生正統丙辰年七十有
九於戲若孺人者不爲賢母耶是可書者乃爲之銘
曰 婦主中饋曰惟其常孟母三遷儒業以倡士謹
於習其成若性况於幼子好惡靡定乃有孺人厥子
以成吾舉其大永昭厥聲

封安人張氏墓誌銘

封安人張氏世家瀘州都察院右僉都御史諱駿之
孫江西布政使司右布政使諱軾之子今鄴都順天
府丞平山楊公之妻也平山幼穎異不群侍先僉事

公於江西按察司特布政公爲同鄉安人方偏愛於
父母慎擇所歸平山議聘愛許焉旣歸事舅姑孝敬
處妯娌雍睦若不但得於家教然者事平山自爲諸
生歷任刑部主事丞順天治於內者咸有儀法故平
山心無內顧得益究心所事以名行著稱人於是知
安人有內助之賢也初平山舉進士母夫人挈安人
至京師踰年遘疾安人躬奉湯藥扶持卧起久益不
少懈比疾革乃執其手曰孝婦孝婦人益知其孝敬
有如此遇妾媵有恩飲食恒與共撫其所出與已者
無纖毫薄厚兒隨甫周歲失母安人鞠育顧腹人視

之若有母者隨旣長亦忘其母之沒歲特薦祀輒哭
之慟其逮下有如此安人正德甲戌八月二十二日
卒享年五十有九子男四長晉育德邑膠克承家學
次節次豫次隨女四一適指揮白卿一適李雲龍餘
未行孫女二晉輩以丁丑十一月七日奉柩葬於朱
家山之原乃以父所序行狀屬余銘諸幽石余偕平
山舉進士同年有通家之誼於安人之賢淑不獨得
於狀也乃爲之銘曰 婦無公事內助非易禮克肅
人恩恒掩義嗟惟安人茂德幽閑歸宜其家大小懼
顏弗怙於豐弗矜於貴賢孝之孚不間外內有幽新

宮卜云其吉世永無虧壺彛攸式

明故丘處士墓誌銘

處士姓丘諱浩字彥廣其先蘇州吳縣人有祖諱大者謫戍雲南之安寧州家焉今爲安寧人考諱禮妣郭氏處士剛毅恬靜克幹蠱起家而孝友之聲蔚聞州里始八歲失恃旦夕慟哭如成人又十三年失怙自括髮及禫哀痛如一日凡經營喪塋務竭其力事繼母楊氏如母歷三十餘年愉色婉容無間母心安焉事兄恭而有禮撫育弟及女弟篤於恩誼女弟旣長偕兄擇嬪於夏氏妝奩之類咸整飭人多之女弟

亦忘其失怙恃也第潤未有室爲娶名族儀物悉如禮比兄溥暨潤繼喪處士皆擇善地以葬而撫恤其諸孤尤至其脩於家者如此若親友之昏喪鄉鄰之困乏無弗調恤安寧有潘千戶者坐誣貧莫能辨處士軫其情濟之竟獲伸其先世貲產盡推讓兄弟以是縉紳之士樂與交遊其勇於義如此晚年郡大夫賢之亦加禮接會 詔覃恩高年乃給章服比正德丁丑以疾不起距其生在正統甲子歲春秋七十有四配楊氏子男四長森次陵爲合州訓導次楚次埜女一適義官孫禎孫男八文燾文燦文煥文輝文榮

文炳文舉文偉炳舉育德學宮孫女四長適魏時美
次適董書中亦皆育德於學餘尚幼處士之昌厥後
又如此卒之年其子陵仕合陽訃至奔歸將卜塋於
之原乃以其友太學生孫正所述狀屬余銘諸
墓石銘曰 善足以提其身慶有以延於後是於處
士爲不負銘以藏之其不朽

李母涂氏孺人墓誌銘

孺人姓涂氏諱香合州泰安鄉人桂峯處士李君之
配也處士諱茂奇字元毓其先有諱之者爲宋理宗
朝承直郎七世祖諱彥字潤甫爲迪功郎皆以名德

聞當世迄今子孫克世其家著姓於合孺人父諱有
春母 氏生而敏慧柔順甫十歲即知有內外之別
爲父母鍾愛桂峯方擇配而孺人資性亦播傳遠許
委禽焉時桂峯大父母俱存孺人旣歸事之能竭孝
愛得其懽心姑周晚病後重孺人恒親吹豕膽以利
之晨昏服食之需未嘗或委於婢妾及卒哀毀踰禮
比塋復脫簪珥以助費桂峯曰吾力足以給之安用
此則曰姑盡心焉耳桂峯雖力農雅好讀古書史孺
人每焚膏侍側勗其志而於農桑之業則常督責家
衆不失候以是家日饒裕其相桂峯祭享則自一俎

一豆以至薦新必致豐潔其處親屬則內諧外附咸有恩愛無違忤其軫念人饑寒則常節已所用以周濟或有負貸不能償者屢言於桂峯焚其券其事桂峯則雖垂老必親執巾櫛不敢自逸或勸止之曰吾職分也且俾子婦輩諭婦道耳其教子則延名師訓迪至夜讀書每手執籌爲記遍數不以祁寒盛暑告勛於乎如孺人者庶幾婦道母儀兩盡者矣孺人生於宣德癸丑歲五月十八日以弘治癸亥五月十六日卒生子男三長曰進次曰起曰述女一適名族孫男四長登次祭次譽次尚幼孫女二曾孫男女各一

述舉弘治戊午鄉進士登育德郡膠孺人屬續述卒

業大學訃至乃號慟奉狀詣余曰述將以月

日從兄進輦葬吾母於之原願得一言書于墓

石余弗獲辭叙而銘之曰猗嗟李氏煌煌厥裔秉

禮植德令聞載世乃有孺人克相其家不顯而耀益

發其華考終於堂卜此幽宅刻詩藏之用昭厥德

明故承直郎懷慶府通判張君墓誌銘

河南懷慶府通判張君元祥以正德乙亥正月十六

日卒於官訃至其弟今刑部尚書元瑞哭之慟縉紳

大夫咸往吊焉元瑞乃杖淚語曰吾兄不幸天顯之

念固自難堪也惟吾二親年踰八袞所鍾情者吾兩人耳固自去年子麟迎養於京還即赴懷慶居數月始歸歸未踰時而吾兄不祿矣是將何以慰於吾親乎遂哭之慟已而疏乞侍養思豫悅焉且獲治兄喪上以公不可去溫旨勉留仍

命有司以禮存問其親蓋異數也元瑞念莫遂其私將卜是歲月日令其子九韶輩塋於邑西武

家蒞祖塋之次乃以都御史石公所述行狀授余屬銘於墓按狀君諱子麒元祥其字別號恒東世家山西代州永樂初有諱大名者始自代徙真定之藁城

今爲藁城人祖考諱得才 贈刑部右侍郎妣王氏
淑人父諱欽 封資德大夫刑部尚書母劉氏夫人
君生而天性凝重甫成童即勤講誦與弟尚書公受
業於舅劉君繼繼明詩經後舉進士仕終浙川知縣
而君遊其門凡所指授無弗領悟遂補邑庠弟子負
課業日有資益成化丁酉偕弟應試順天繼弟中式
乃大喜曰吾弟之中與我不異也吾門之昌大其自
此乎已而歸益自淬礪不懈又知其所不足聞清平
張內翰天祥善造士乃約同志者負笈來京從之遊
又大有所造詣時以元方擬之識者曰不誣也父之

連試於有司不偶遂應貢入太學正德戊辰謁選銓曹授平陰知縣旣蒞任以仁恕爲政不事煩苛而亦無敢干其禁令者人多訟之時劇盜充斥州邑多罹殘破君嚴備豫盜竟不入其境平陰得藉無虞撫按者廉其能檄下嘉獎壬申冬陟懷慶府通判兼司水利未秩滿而獲遷固異等也在懷慶尤盡心所事雖於微小者亦加慎每至春則躬督民疏濬溝洫以備旱澇民咸賴焉蓋其蒞官之勤不後聲利以釣時譽類如此至是卒士民皆奔哭惜之距其生景泰乙亥享年六十有一配馬氏出邑世族賢而能助於內

生子二長九韶以義授七品散官次九經國子生女
三長適國子生李梅次適劉坤次適米恩皆名族孫
男一君事親孝交友信處鄉里不鮮苟同流俗蓋自
弱冠至易簣未有過失聞於人者是宜銘乃銘之曰
處不變於俗兮而德則式於人仕不爲乎已兮而澤
則濡於民斯其萬世之藏兮石可泐而名不能以沉
淪

封太宜人張母鍾氏墓誌銘

贈河間府同知張公之配鍾氏封太宜人今兩淮運
使諱汝賢之繼母也系出內江名族父諱靈仕通州

衛經歷母

氏太宜人。生而端靜誠懿，稍長以習女

事，聞於鄉黨。河間公元配高氏卒，子汝賢方六歲，擇繼以母之者，不易乃得太宜人焉。既歸，公指汝賢語之曰：「吾嘗恠古今繼室者非性行大絕倫，其視前室子飲食衣服類不若已出者，是兒吾亡室所遺也。將累汝乎？言未畢，悲咽不能止。宜人應曰：「諾亦悲咽不能止。自後顧腹教育逾於已所出，汝賢就外傳歸，即詣讀書，所撫綏勤渠不少懈。曰：爾父以業儒起家，爾或弗克，紹將謂我不能母視之矣。盍自勉，庶慰爾父所以付我者乎？」比汝賢學成，以弘治二年舉於鄉。九

年登進士歷官中外赫赫著聲績故河間公初獲贈
文林郎宜興縣知縣配高氏孺人太宜人封亦如之
尋汝賢晉秩河間同知復加贈父及配如式而太宜
人亦加今封焉太宜人於是心爲之喜人謂非母之
教固不能也太宜人秉性儉朴不喜華侈而於賓祭
則務豐潔上事舅姑敬順無少違意旣歿凡送終之
事所以相河間者無遺力傍接宗族咸有恩禮雖御
僮僕亦得其心其婦道母儀稱於內外者如此子二
長即汝賢次阡蜀府引禮舍人女二長適黃卷育德
邑庠次適李中度孫男一象祖孫女五太宜人以正

德十年八月十七日卒享年五十有九汝賢將以卒
之明年月日奉柩啓河間公之窆合葬乃問
銘於余爰按狀叙其行之大者銘曰

孰不爲子而有履霜不懼於裏亦世之常婉婉宜人
我則爲母母視其子曷有前後乃見其成

錫命自天於赫錫命賁及幽泉於戲母道之篤是
惟無愆

封太孺人張母房氏墓誌銘

封太孺人房氏贈監察御史張公之配監察御史縉
之母也以正德甲戌十二月二十四日屬纊其子御

史君將奉柩合江祔葬公墓余既叙公世系邑里銘之矣繼以陰陽家忌弗克祔乃卜地巴縣石漕溪蟠龍山之陽而以先所銘者藏公墓前復持刑部負外郎曹君嘉正所述太孺人之懿行屬銘於墓其塋以丙子九月二十八日也太孺人出合江名族祖諱章仕爲上海知縣以治行著稱父諱永昇母柯氏太孺人生而慧順爲父母所鍾愛比及笄擇配於公旣歸善事舅姑親黨咸賢之舉以矜式諸婦同居踰千指盖自二世以來未析爨太孺人助公內政凡服食之需所以處分者咸得其懽心故相以內雍雍怡怡無

不諧協公急於調貧恤匱孺人應之若不自知其乏
勤於饋食凡享祀之節無弗虔凡賓客之宴無或廢
從子綱幼孤孺人鞠之恩踰其母比有室異居猶時
有所給予及助婚嫁之資公既卒率諸子婦以治家
益嚴課諸子讀書不以愛弛恒節縮冗費以厚給之
曰俾無分用其志也以是縉纁二子不敢懈皆以戊
午辛酉先後舉於鄉縉舉進士至今官遂被

恩封太孺人間里以爲榮然御史君方以才行顯名
將來褒崇未艾太孺人之脩飭於家者如此於公誠
內助之良婦道母儀兩無愧矣太孺人享年八十子

男五女二孫男五孫女三曾孫男二其詳余已具公墓誌此獨詳太孺人之內行以銘之法當然也銘曰
婦人助內曰惟勤儉慈訓閨門不皆外見吁嗟孺人
秉德由衷承家裕後日大以豐乃膺

錫命象服孔章福履之綏流澤未央惟茲令終龍岡
獲卜合塋非古豈今所獨成都鬱鬱蟠龍葱葱相望
伊邇若堂未封

明故戶部主事戴君墓誌銘

戶部主事白齋戴君義士也負性豪邁成化甲午舉
於鄉入太學嘉驥名士淬礪所業瓊山丘文莊公爲

祭酒每季試刻文理之優者爲程式名曰進脩錄君
文與馬甲辰舉進士觀政戶部慨然有志於天下會
星變即䟽正身心以端本明彝倫以敷教作人才以
待用綏中國以來遠脩武備以戒戎廣視聽以延納
官賢能以佐理遵典則以考成存儆畏以格天識者
躉之授南京戶部主事督玄武湖稽黃冊故事庫匠
僉畿縣民上戶充役積乂多賂免君首移革之及諸
病於民者人稱便弘治戊申

孝宗敬皇帝登極君復䟽急先務以敦元化明年同
事者方給事中向以言事忤守備官致擣撫庫事誣

奏其罪君坐累比獄成度方應獲重譴乃毅然曰方
諫官敢言其職也 聖明在上可以罪言官聞乎遂
抗疏引罪自劾時服其氣節已而竟除名君不色愠
其忠憤所激如此屬蜀中歲大侵不能歸授徒徐淮
間大家名族咸遺子弟從游越丙辰始獲歸程御史
文吏部黃郎中金巡按姚御史祥咸疏薦於

朝不獲用居林下目擊邑里徵歛煩重嘗爲芻蕘論
以上諸當道雖家食務節縮所自給者儲義穀惠族
人及里隣之無告者性至孝蚤失怙恃每追念劬勞
輒悲不自勝未嘗稱觴作樂所著詩文有綱卷邇言

易詠正德間盜入邑君不能避盜亦知之不敢執其
履行如此君諱錦字伯綱別號綱菴都御史見素林
公更今號其先湖廣蘄水人元季高祖諱仁傑者避
兵長壽縣隆安鄉今家焉遂爲長壽人父諱本辟從
事於邑仕淮安稅課司大使母葉氏君自祖母以家
艱向從廬姓至君歸始改復焉君卒正德丁丑九月
二十四日享年七十有一配徐氏先卒繼娶王氏子
男二長之早卒次元道邑庠生女一適酉陽宣撫
司學生蘇廷僉孫男二長寶次宇孫女一君卒之明
年正月六日元道卜祔葬於石莊徐孺人之左奉狀

請余銘余嘗惜君使得究用當異世之齷齪以苟祿
仕者銘固宜辭曰志欲致於用才非與世違曷終
困於躓嗚呼命取其奚疑

明故甘泉尹李君墓誌銘

致仕甘泉尹李君年八十矣童顏鶴髮強健如少壯
然凡親友吉凶慶弔無不與而人亦重其至其笑語
嚶嚶家無餘貲恒樂應人之急初不屑介於意也今
年戊寅正月九日忽以疾不起余於君非遠出無旬
日不會至是不會者連旬每問疾則寢劇已而聞訃
乃偕弟衡仲往哭焉則其室如縣罄盖非以官爲家

者可哀也已君諱堯字宗岱其先湖廣人元季有諱
斌者始遷重慶之巴縣家焉祖諱存敬考諱懋母翁
氏生二子長森次即君甫八歲失怙母鞠育守志稍
長不欲使出就外傳即令從森授業且皆課之嚴未
嘗溺愛少縱逸每戒之曰我未亡人異日所恃以見
而父於地下者可不知所以自力乎悲泣不自勝父
之先御史尚書公以明麟經有聲場屋母令森復遺
從游先公以君志嚮不凡也亦器之所以指授勗勵
之者有加焉遂成化乙酉獲薦鄉書時其兄以博士
弟子補國子生母於是始色喜曰可自慰矣君性孝

友母年老多病君每當禮闈會試不欲遠違膝下母
迫趣始就道既試不入太學即歸人或以於仕路格
應滯勸之則應曰古人一日養不以三公換况遲速
間乎故舉於鄉踰十年名姓未繫仕籍比母卒而後
入太學如例注選識者重之兄先卒君撫其孤如子
教之成立亦補郡博士弟子負先卒君雖樂易不設
城府然居官謹飭職無不辦弘治壬子就選尹甘泉
甫莅任目擊民之凋敝惻然思所以甦息之遂稽民
之在籍者若干逃移者若干乃慨然嘆曰今盡以額
稅攤納在籍者將不至趣使逃移乎具疏請於

朝得蠲逋負乃招流移以均徭役稽荒田以募佃種
一時人知有所賴相率歸復業凡興學育才鋤強植
弱事有關於民利害者咸先後罷行遂以治績發聞
時延安守崔陞者孜孜爲民於君甚重之每加獎勵
示激勸九載秩滿當奏績銓曹計資宜得叙遷君不
赴懇乞休於按治御史今司徒石公玠遂許之將以
厲沉酣仕途者民聞之攀轅無以留相與醖金帛爲
贐具輿馬送於家人咸頌之比在林下非公事未嘗
入公門但時赴鄉飲大賓之召或禮意少愆亦不往
也惟日侍先公如在函丈時依依不少違比先公

先母夫人棄背君持心喪處余兄弟間若非異姓者
識者謂敦師生之誼如君亦僅見矣配同邑馬氏有
令德先卒繼娶彭氏湖廣安陸人父任重慶府經歷
子二長敷蚤卒次暢府學生女四長適教諭孫學臯
次適羅賢次適張明遠皆馬氏出次出側室未受聘
孫男三執和執恭怡孫女三長適府學生萬年次皆
幼暢卜以是歲十月二十六日奉柩與母合葬於邑
之九龍灘宋家山之原以戶部郎中鄧廷贊所具狀
屬余銘於幽石余誼莫能辭銘曰士有不謀其身
而無慊於心者其所得於中固卓然也嗟君少年登

科晚始入仕既仕而歸不異貧士是豈無特操者耶
於戲惡得無銘以昭後人

明鄉貢進士楊直夫墓誌銘

直夫諱廷平直夫其字別號龍山世爲新都人大父
諱致以孫貴贈光祿大夫柱國少保兼太子太保戶
部尚書文淵閣大學士父諱春湖廣按察司僉事受
封如大父官號留耕世稱留耕先生母葉氏贈一品
夫人直夫剛毅朴直性至孝留耕公官京師時方成
童侍大母熊夫人於家承頰左右無違而以餘力攻
舉子業夫人喜曰是兒事我不異若父留耕公聞之

心亦安焉比夫人病旦夕視湯藥惟謹旣屬續以禮治喪有勸之從俗延浮屠者直夫峻謝曰理之有無未暇論要非吾儒所當事也弘治戊午舉於鄉赴試京師道聞留耕公得致事且知母夫人不豫亟取道趨荊州適夫人舟艤江濱一見喜曰不意見來此我病當愈矣一夕夫人病革直夫焚香籲天求以身代遂飲夫人所吐痰一盂曰願移病於兒也尋夫人不起扶柩載舟經瞿塘峽風濤惡甚舟人股栗爭謀奔岸直夫拊柩哀慟且慰母曰兒在此毋恐未幾風息無事抵家居喪一如禮免喪今兄少師公暨弟工侍

制當復任留耕公曰吾老矣四子皆當往柰何直夫
應聲曰兒留不往也自後日就養膝下每當試期皆
不至歲乙丑至又以少師公主試事退避以是雖工
時文竟未第禮闈人或爲直夫少之直夫了不介意
曰吾獲侍養所得固多也居常務勤儉一布袍餘二
十年猶不厭澣濯每寢當夜分輒起披衣危坐思是
日所爲何事所讀何書所得何理嘗曰不勤則業易
荒不儉則財易費故扁其樓曰勤讀曰儉用若博奕
遊勝之樂泊然無所企慕或強之則曰朴拙風流自
是兩事吾從吾所好耳因顏其軒曰養拙其操尚如

此視流連光景者若不屑亦可謂不受變於俗矣而
竟未及仕以顯今在戊寅二月十一日倏卒春秋僅
五十有四嗚呼惜哉配劉氏子男二長愷癸酉鄉貢
進士次悌儒學生員皆秀異不羣女六長適龍州宣
撫薛紹勳子藩次受聘俱卒次適內江劉副使五清
子應表次適成都刑部李主事子奕三尚幼君卒餘
兩月愷卜以六月 日葬於 之原乃奉狀屬
銘余以同鄉得接杖屨於留耕公暨交少師公伯仲
間固嘗槩聞其行誼者乃銘之曰

孰非世族兮鮮克似之禮以制中兮何莫由斯有美

君子兮政自家施孝得其親兮承懽無時乃詒厥胤
兮曷惟我爲於赫名宗兮紹休永垂